



## ***Pêşbirka hovan li Kurdistanê didome***



**Mehmet Filiz**

Berê jî gelek caran dagîrkarên Kurdistanê ketibûn pêşbirka kuştin û qirkirina kurdan. Niha niyeta wan heye ku vê komkujiyên xwe berdawam bikin. Wisa diyare ji bo xelata kuştina kurdan bi destxin, ev pêşbirk dê hê bi salan bidomîne. Bi taybet rejîma melan ya Îranê û rejîma turkên pir reng (rojêkê kemalîstên layîk, rojêkê panislamiyên tirk) ev herdu dewlet di van rojên dawî de ketine pêşbirkeke pir xeter.

Îranê di van salên dawî de, ji bo ku peywendiyên xwe bi Tirkîyê re xweş bike, li dijî kurdan her tiştî dîke. Dardekirina kurdan, topbarînên hevkar yê li ser herêmen Kurda, operasyonên bi hev re li dijî şarevanên Kurda û gelek kirinên li paş perdan... Îranê pêşî Hasan Hikmet Demir, Fesih Yasemini û Ihsan Fetahiyan, kirine qurbanê van peywendiyên qirêj û pişt re hevkarîya leşkerî destpêkir. Di vê meha Gulanê de 4 jê andamên PJAK ê 5 kesên din kirine qurbanê vê pêşbirka qerêj. Şîrîn Elemhulî, Ferzad Kemangar, Ali Heyderiyar, Ferhad Wekili û Mehdi Eslamiyan bêyî ku mafê paristîna bidine wan, ew di zîndana "Evînê" de (zîndana zilmê) dardekirin. Roj tune ku Tirkîyê û Îran ji bo kuştina kurdan bi hev re rûnenin. Her roj li Îranê Kurd tene kuştin. Kurd bi navê qaçaxî kirin, bazarganiya narqotîkê, li dijî Şerîatê hatin û hinan jî bi navê dijminên rejîma Xwedê dikûje. Her meh bi dehan kes ji aliyê rejîma Îranê ve tene dardekirin.

Li aliyê din dewlata tirk zêdeyî niv milyon leşker, polîs, mît û cahşên xwe rakirîye nêçîra kuştina keç û kurên Kurda. Li gelek deverên Kurdistanê operasyon hene û roj nîne ku kuştin çê nebe. Çiya, gelfî û niwalên Kurdistanê bi top, tang û balafirên xwe bombebaran dikin. Daristanên Kurdistanê bi hemû zîndiyên ku di nav wan de dijîn, dişewitînin. Van hemû kirinên xwe hê jî kêmbûn û roja 20 Gulanê zêdeyî 50 balafirên şer, bê rawestan 7 demhêjmeran li ser Herêma Kurdistanê avêtin.

Dewlet, vê hovitiya ku li Kurda dibe weke mizgîniyê pêşkêşî bîner û xwendevanên xwe dikin. Weke serkeftineke dîplomasî ya di navberî dewletên xwe de didine nîşandan. Peywendiyên dewletên wan yê leşkerî û Aborî wijdana wan jî kor kiriye. Ji bo berjewendiyên xwe, raya giştî ya van dewletan ji komkujîya Kurda re li çepikan didin. Bi çavên nijadperestiyê li kurdan dinêrin. Mînek bi îmzekirina Peymana di navberî Tirkîye, Birêzîliye û Îranê de çameniya turka peymanê Qesraşîrîn tanî bîra Kurda û Kurd tehdît dikirin. Li Suriyê roj nîne ku Kurda negirin û wan nekine zîndanê. An jî wan nerevênin û nekûjin.

Suriyê, di bin zilma îdeolojiya nijadperestîya Baasî de kurdan dikûje û zîndan dîke. Kurdên ku ev bi hezarên salan li ser vê axê dijîn wan weke biyaniyan (Ecnabî) dibîne û nasname hemwelatîyê nadê wan. Yê ku berê nasname dabûna wan jî, di vê meha Gulanê de ji gelek kesan dîsa sitand. Kurdên neviyên Hûrî û Mîtanîyan vêga li ser axa bav û bapîrên xwe biyanî tene hesabandin.

Gelê Kurd ê ku mafên xwe yê herî demokratîk dixwaze ji aliyê van dewletên dagîrkar ve rûbirûyî qirkirinê ma ye. Bê guman, ev pêşbirka qirêj bi hevpeymanên di navbera Tirkîye, Îran, Suriy û Îraqê de dibe. Di vê pêşbirka dagîrkarên Kurdistanê ya kuştin, talan, êş û koçberî yê de gelê Kurd di bin hovîtiyeke mezin de ye. Li Kurdistan bi dagîrkariya qilasîk re, dagîrkariya nûjen heye. Hem welatên Kurda talan dikin, hem mêjiyê Kurda pûç dikin û didizin û hem çand û zimanê Kurda qedexe ye. Bi alîkariya dewletên mezin li Kurdistanê faşîzmeke dijwar a dagîrkaran li ser kar e.